

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 494441 25 St
Tuzla, 10.11.2025. godine

Općinski sud u Tuzli, sudija Antonela Đaković kao stečajni sudija, u postupku prethodnog ispitivanja prijedloga za otvaranje stečajnog postupka nad imovinom dužnika "Koksara" d.o.o. Lukavac za proizvodnju koksa, hemijskih proizvoda i energije (raniji naziv: GLOBAL ISPAT KOKSNA INDUSTRIJA d.o.o. Lukavac za proizvodnju koksa, hemijskih proizvoda i energije), ul. Željeznička broj 1, Lukavac, dana 10.11.2025.godine, donio je

RJEŠENJE

- I **OTVARA SE stečajni postupak** nad imovinom dužnika "Koksara" d.o.o. Lukavac za proizvodnju koksa, hemijskih proizvoda i energije (raniji naziv: GLOBAL ISPAT KOKSNA INDUSTRIJA d.o.o. Lukavac za proizvodnju koksa, hemijskih proizvoda i energije), ul. Željeznička broj 1, Lukavac upisan u sudski Registar ovog suda broj MBS: 1-12685, JIB: 4209477990003, broj poslovnog računa 134-580-100-397-4473, otvoren kod ASA banke d.d. Sarajevo
- II **Stečajni postupak se otvara sa danom 10.11.2025. godine**, kada se rješenje o otvaranju stečajnog postupka ističe na Oglasnoj tabli suda. Oglas o otvaranju stečajnog postupka objaviće se u „Službenim novinama FBiH“.
- III **Za stečajnog upravnika imenuje se Almir Bajrić iz Tuzle, Aleja Alije Izetbegovića 3B.**
- IV **Pozivaju se povjerioci da u roku od 30 dana**, od dana objavljivanja oglasa o otvaranju stečajnog postupka u „Službenim novinama F BiH“ prijave svoja potraživanja stečajnom sudu dostavom prijave i priloga u dva primjerka u skladu sa odredbama Zakona o stečajnom postupku o prijavi potraživanja (član 110. Zakona), te prilože dokaz o uplaćenju sudskoj taksi na prijavu potraživanja u iznosu od 1% od vrijednosti potraživanja, s tim da taksa ne može biti manja od 50,00 KM, niti veća od 10.000,00 KM, na žiro račun broj: 1321000256000080 – Vrsta prihoda: 722221 Budžet Tuzlanskog kantona.
- V **Pozivaju se povjerioci da u roku od 30 dana**, od dana objavljivanja oglasa o otvaranju stečajnog postupka u „Službenom novinama F BiH“, stečajnog upravnika obavijeste koja prava osiguranja potražuju na predmetima imovine stečajnog dužnika. Potrebno je navesti predmet na kome se potražuje pravo osiguranja, vrstu i razlog nastanka prava osiguranja kao i osigurano potraživanje.
- VI Pozivaju se lica koja imaju obaveze prema stečajnom dužniku da ih bez odlaganja izvrše.

- VII Otvaranje stečajnog postupka ima se upisati u sudski Registar ovog suda, Zemljišno-knjižni ured Općinskog suda u Lukavcu i kod Službe za geodetske i imovinsko-pravne poslove Grada Lukavac.
- VIII **Skupština povjerilaca (ispitno ročište) na kom će se ispitati prijavljena potraživanja zakazuje se za dan 11.02.2026. godine u 11,00 sati, u zgradi Općinskog suda u Tuzli, ul. ZAVNOBIH-a b.b., sudnica S1-prizemlje.**
- IX **Skupština povjerilaca (izvještajno ročište) na kome će se na osnovu izvještaja stečajnog upravnika odlučiti o daljem toku stečajnog postupka održat će se istog dana nakon ročišta za ispitivanje prijava potraživanja.**

Obrazloženje

„Koksara“ d.o.o. Lukavac za proizvodnju koksa, hemijskih proizvoda i energije (raniji naziv: GLOBAL ISPAT KOKSNA INDUSTRIJA d.o.o. Lukavac za proizvodnju koksa, hemijskih proizvoda i energije), ul. Željeznička broj 1, Lukavac, kao dužnik podnio je putem zastupnika po zakonu predlagača dana 29.09.2025. godine ovom sudu prijedlog za otvaranje stečajnog postupka nad ovim pravnim subjektom, zbog platežne nesposobnosti dužnika, temeljem odredbe člana 4. i člana 6. Zakona o stečaju („Sl. novine FBiH“, broj 53/2021).

Nakon razmatranja prijedloga sud je rješenjem od 08.10.2025. godine pokrenuo prethodni postupak radi utvrđivanja uslova za otvaranje stečajnog postupka i imenovao privremenog stečajnog upravnika temeljem odredbe člana 60., 61. i 63. Zakona o stečaju. Za privremenog stečajnog upravnika imenovan je Almir Bajrić iz Tuzle ul. Aleja Alije Izetbegovića broj 3B. Rješenje o pokretanju prethodnog postupka objavljeno je u Službenim novinama FBiH 81/25 od 22.10.2025. godine, na oglasnoj tabli suda i WEB stranici-elektronskoj tabli suda.

Privremeni stečajni upravnik u spis suda dostavio je izvještaj o provedenom prethodnom postupku sa nalazom i mišljenjem na okolnosti postojanja razloga za otvaranje stečajnog postupka. Temeljem član 102. stav 1. Zakona o stečaju zakazano je ročište radi ispitivanja uslova za otvaranje stečajnog postupka i rasprave o izvještaju privremenog stečajnog upravnika za dan 05.11.2025. godine, na koje ročište su pristupili privremeni stečajni upravnik Almir Bajrić iz Tuzle, za predlagača i dužnika generalni direktor Jasmin Ovčina i izvršni direktor za ekonomsko finansijske poslove Osman Abadžić.

Privremeni stečajni upravnik dostavio je izvještaj o provedenom prethodnom postupku ovom sudu dana 03.11.2025. godine, a koji izvještaj je razmatran na ročištu dana 05.11.2025. godine. Iz izvještaja privremenog stečajnog upravnika proizilazi da: pravni subjekt „Koksara“ d.o.o. Lukavac nije u mogućnosti da izvršava svoje dospjele i potraživane obaveze, te polazeći od toga da su transakcijski računi često u blokadi, ekonomsko stanje navedenog privrednog subjekta je loše, poslovanje je već duži vremenski period izvan svih ekonomskih modela, te se trenutno održava proizvodni minimum. Iz bilansa stanja na dan 31.12.2024. godine proizilazi da dužnik Koksara d.o.o. Lukavac (ranije: GIKIL d.o.o. Lukavac) ima proknjiženu knjigovodstvenu vrijednost imovine ukupne aktive od 485.544.734,00 KM. Od navedenog iznosa na dugoročnu imovinu u knjigovodstvenoj vrijednosti odnosi se dio od 397.116.793,00

KM, od čega se najveći dio odnosi na konto nekretnine, postrojenja i oprema u iznosu od 349.828.487,00 KM. Od navedenog konta nekretnine, postrojenja i oprema na zemljišta se odnosi 48.170.998,00 KM, građevinske objekte iznos od 106.025.883,00 KM, postrojenja oprema i namještaj iznos od 173.823.049,00 KM i ostalo. Proknjižena vrijednost kratkoročne imovine na dan 31.12.2025. godine iznosila je 88.427.941,00 KM (zalihe, sirovine, proizvodnja u toku, gotovi proizvodi, roba i dr.), a što se smanjivalo do dana pokretanja prethodnog postupka, te će se isto otvaranjem stečajnog postupka utvrditi detaljno kroz popis imovine. Na dan pokretanja prethodnog postupka 08.10.2025. godine evidentirane su manje promjene na stalnoj imovini, a kroz stečajni postupak će se detaljno ispitati sva imovina, izvršiti nova procjena te utvrditi tačna vrijednost stečajne mase, a što proizilazi iz Izvještaja o finansijskom položaju na kraju perioda (Bilans stanja) i bruto bilanse koji se nalaze u spisu predmeta i sastavni je dio ovog izvještaja privremenog stečajnog upravnika. Na osnovu finansijskih izvještaja za navedeni period 2024. godina društvo Koksara d.o.o. Lukavac (ranije: "GIKIL d.o.o. Lukavac") ima negativan finansijski rezultat te ostvaren gubitak iznosi 118.374.907,00 KM. Na osnovu finansijskih podataka za period od 01.01.2025. godine do 31.08.2025. godine, društvo Koksara d.o.o. Lukavac (ranije: "GIKIL d.o.o. Lukavac") ima negativan finansijski rezultat, te operativni gubitak iznosi cca 37.000.000,00 KM, a koji se nastavio i dalje u Septembru i Oktobru 2025. godine, a da finansijska stabilnost preduzeća proizilazi prije svega iz odnosa imovine i obaveza društva.

Privremeni stečajni upravnik je uvidom u bilanse društva utvrdio da dužnik Koksara d.o.o. Lukavac (ranije: GIKIL d.o.o. Lukavac) ima značajnu vrijednost pokretne imovine u iznosu knjigovodstvene vrijednosti od 173.828.049,00 KM, od koje je većina u funkciji (proizvodnja se odvija), i koja će se otvaranjem stečaja ponovno izvršiti popis i procjena, a da je dio pokretne imovine pod zalogom povjerilaca. Potraživanja od kupaca na dan 31.12.2024. godine iznosila su 39.202.510,00 KM, međutim ista su do dana pokretanja prethodnog postupka 08.10.2025. godine značajno smanjena, ista će se nakon svih rasknjižavanja detaljno utvrditi nakon otvaranja stečaja. Proknjižene obaveze prema zadnjim predatim bilansama na dan 31.12.2024. godine iznose ukupno 462.546.038,00 KM, od kojih se: iznos od 255.900.513,00 KM odnosi na dugoročne obaveze po osnovu razgraničenja i postupaka (većina obaveze prema Moorgate Industries UK), iznos od 206.645.525,00 KM odnosi na kratkoročne obaveze i to: obaveze prema kratkoročnim vrijednosnim papirima iznos od 639.491,00 KM, obaveze prema dobavljačima 154.187.150,00 KM, obaveza po uzetim kreditima 19.258.276,00 KM, obaveze po osnovu plaća i naknada plaća iznos od 408.327 KM, ostale druge obaveze 28.619.478,00 KM, i druge manje obaveze. Privremeni stečajni upravnik je utvrdio da na dan otvaranja prethodnog postupka 08.10.2025. godine dodatno su povećane obaveze prema dobavljačima na iznos od 171.598.432,33 KM, uz veliko povećanje obaveza prema zaposlenim koje zajedno sa doprinosima iznose 8.610.014,00 KM i koje će biti uvećane do dana otvaranja stečaja nakon svih knjiženja.

Također u toku prethodnog postupka utvrđeno je da dužnik Koksara d.o.o. Lukavac ima aktivne sudske postupke u kojima se pojavljuje i kao tužena strana, a i kao tužitelj. Među značajnijim sudskim postupcima koji su veće vrijednosti u kojima se dužnik pojavljuje kao tužena strana-izvršenik su:

- Global Stell Holdings Limited -u likvidaciji br.predmeta 32 0 Ps 374635 20 Ps - vsp. 77.581.326,00 KM

- Global Stell Holdings Limited -u likvidaciji br.predmeta 32 0 Ps 378407 24 Ps 2 vsp. 139.341.724,60 KM
- Moorgate Industries UK Limited- broj predmeta 126 0 Ip 166950 14 Ip, vsp. 66.372.440,00 KM
- Moorgate Industries UK Limited- broj predmeta 126 0 Ip 166934 14 Ip, vsp.203.104.462,920 KM

Transakcijski računi su često u blokadama (blokirani i u toku prethodnog postupka te intervencijom privremenog stečajnog upravnika u skladu sa Zakonom o stečaju FBiH odblokirani), tako da na dan izvještaja računi su aktivni bez značajnih novčanih sredstava na računima, a da prema podacima Porezne ispostave Tuzla društvo ima zaposlenih 789 zaposlenika na dan 30.09.2025. godine.

Nadalje, platežna nesposobnost dužnika je evidentna kroz neplaćanje poreza i doprinosa za više od 800 zaposlenih radnika. Prema uvjerenju Porezne uprave Federacije BiH – KPU Tuzla – Porezni ured Tuzla broj 13-3/6-12-5-6569/25 dužnik ima evidentirane a neizmirene obaveze u iznosu od 5.379.830,19 KM. Za navedeni donijeta su Rješenja o pokretanju prinudne naplate brojeva 13-3-01-12-26-25-01544-1-30 od 17.09.2025. godine po osnovu obaveznih doprinosa i poreza na iznos od 1.198.880,00 KM, zatim Rješenja broj 13-3-01-12-26-25-01429-1-30 od 26.08.2025. godine na iznos od 4.317.212,36 KM. Porezi i doprinosi se ne plaćaju nikako u vremenskom periodu većem od 8 mjeseci. Pored prethodno navedenih dospjelih a neizmirenih obaveza dužnika, dospjele obaveze prema dobavljačima na dan pokretanja prethodnog postupka 08.10.2025. godine iznose: obaveze prema dobavljačima u inostranstvu 148.968.658,15 KM kao i obaveze prema dobavljačima u zemlji u iznosu od 17.658.797,00 KM. Dakle, iz prethodno navedenog proizilazi da sukladno članu 61. te članu 63. Zakona o stečaju, prijedlog za pokretanje stečajnog postupka nije podniet u roku od 60 dana od dana nastupanja platežne nesposobnosti kada je to bio dužan da podnese stečajni dužnik, odnosno organ ovlašten za zastupanje stečajnog dužnika.

Poslovanje dužnika je nastavljeno kroz prethodni postupak, te je održan minimum tehnološkog procesa za nastavak i održavanje kontinuiteta proizvodnje, postoje uslovi da se nastavi u cijelosti poslovanje zajedno kao tehnološki proces, s tim da se hitno bez odlaganja mora provesti interno restrukturiranje društva kroz veliko smanjenje fiksnih troškova i uticaj na smanjenje varijabilnih troškova kroz disperziju rizika nabavka sirovina za proizvodnju na eventualne strateške partnere koji bi finansirali nabavke sirovina a ujedno i bili kupci/prodavci gotovog proizvoda. Dužnik „Koksara d.o.o. Lukavac“ (ranije: GIKIL d.o.o. Lukavac) ne može samostalno nastaviti vođenje proizvodnje bez jakog strateškog partnera. Neophodna su velika finansijska sredstva za nabavku svih sirovina kako bi se dodatno smanjio trošak nabavke za što dužnik nije imao kapacitet niti svih prethodnih godina kao i finansiranje prodaje imajući u vidu da se naplata gotovih proizvoda odgađa, a sada posebno bez velikih finansijskih sredstava ne može izvršiti neophodne uštede.

Na osnovu svega navedenog privremeni stečajni upravnik je mišljenja da:

–privredno društvo „Koksara“ d.o.o. Lukavac (raniji naziv: GLOBAL ISPAT KOKSANA INDUSTRIJA d.o.o. Lukavac), nije u mogućnosti da izvršava svoje dospjele i potraživane obaveze plaćanja neprekidno u trajanju preko 60 dana, kao i da ima prijeteću platežnu nesposobnost stekli su se zakonski razlozi za otvaranje stečajnog postupka definisani članom 6. Zakona o stečaju Federacije BiH.

-postoje uslovi da se nastavi poslovanje u cijelosti s tim da dužnik „Koksara d.o.o. Lukavac“ (ranije: GIKIL doo Lukavac) ne može samostalno nastaviti vođenje proizvodnje bez jakog strateškog partnera. Neophodna su velika finansijska sredstva za nabavku svih sirovina kako bi se dodatno smanjio trošak nabavke za što dužnik nije imao kapacitet niti svih prethodnih godina kao i finansiranje prodaje imajući u vidu da se naplata gotovih proizvoda odgađa, a sada posebno bez velikih finansijskih sredstava ne može izvršiti neophodne uštede. Osnovni ekonomski i Zakonski uslov svega navedenog jeste pronalazak rentabilne tačke poslovanja u kojoj dužnik Koksara d.o.o. Lukavac ne bi ostvarivao gubitke, održao kontinuitet proizvodnje i čim prije pronašao buduće potencijalne kupce. Privredno društvo „Koksara“ d.o.o. Lukavac, ima pokretne i nepokretne imovine čijim bi se unovčenjem mogli pokriti troškovi stečajnog postupka i djelimično namiriti povjerioci stečajnog dužnika.

Generalni direktor predlagača/dužnika Jasmin Ovčina i izvršni direktor predlagača/dužnika za ekonomsko finansijske poslove Osman Abadžić su na ročištu za utvrđivanje uslova za otvaranje stečajnog postupka održanom dana 05.11.2025. godine izjavili da nemaju primjedbi niti prigovora na izvještaj privremenog stečajnog upravnika Almira Bajrić i da su mišljenja da su se stekli uslovi za otvaranje stečajnog postupka.

Imajući u vidu navedeno, stečajni upravnik je mišljenja da postoji razlog za otvaranje stečajnog postupka nad imovinom navedenog dužnika, predviđeni čl. 6. stav 2. i čl. 102 Zakona o stečaju (Službene novine FBiH broj 53/21), te da je uplaćeni predujam od 50.000,00 KM dovoljan da pokrije troškove postupka do održavanja skupštine povjerilaca do unovčavanja imovine koja čini stečajnu masu stečajnog dužnika.

Stečajni dužnik, a što proizilazi iz izvještaja i mišljenja privremenog stečajnog upravnika nije u roku od 60 dana od dana nastupanja platežne nesposobnosti podnio prijedlog za otvaranje stečajnog postupka.

Odredbom člana 102. stav 6. Zakona o stečaju je propisano da stečajni sudija otvara stečajni postupak nad imovinom stečajnog dužnika ako je prijedlog dopušten, ako postoji stečajni razlog i ako će imovina stečajnog dužnika prema predviđanju biti dovoljna da namiri troškove postupka.

Dakle, po okončanju faze prethodnog stečajnog postupka, odnosno prilikom odlučivanja o prijedlogu za otvaranje stečajnog postupka, sud je utvrdio da je prijedlog za otvaranje stečajnog postupka dopušten, kumulativno su ispunjeni stečajni razlozi za otvaranje stečajnog postupka, te je utvrđeno da postoji imovina koja čini stečajnu masu i koja će biti dovoljna za namirenje troškova stečajnog postupka.

Prvenstveno, u konkretnom slučaju, sud utvrđuje da je prijedlog za otvaranje stečajnog postupka dopušten, jer je podnesen od strane stečajnog dužnika kao lica koje je ovlašteno da podnese prijedlog u smislu odredbe člana 58. stav 2. Zakona o stečaju.

S obzirom da društvo nije u mogućnosti da ispunjava svoje dospjele obaveze, sud utvrđuje da postoji stečajni razlog u vidu platežne nesposobnosti dužnika, a u smislu odredaba člana 6. Zakona o stečaju kojima je propisano da se stečajni postupak može otvoriti ako sud utvrdi postojanje stečajnog razloga (stav 1.), da je jedan od razloga za otvaranje stečajnog postupka platežna nesposobnost stečajnog

dužnika (stav 2. tačka a.), a da platežna nesposobnost postoji ako stečajni dužnik 60 dana neprekidno ne izmiruje svoje dospjele novčane obaveze ili je račun stečajnog dužnika blokiran 60 dana neprekidno (stav 6.), uz napomenu da je i zastupnik stečajnog dužnika izričito izjavio da je saglasan sa stavom da se stečajni postupak treba otvoriti, a pored toga isti je i podnio i prijedlog za otvaranje stečajnog postupka nad stečajnim dužnikom.

Slijedom navedenog, sud nalazi da su ispunjeni svi uslovi propisani odredbom člana 102. stav 6. Zakona o stečaju za otvaranje stečajnog postupka.

Obzirom na složenost ovog stečajnog postupka, sud će u skladu sa odredbama člana 82. Zakona o stečaju (Objavljeno u "Službene novine FBiH", broj 53/2021), nakon otvaranja stečajnog postupka imenovati privremeni odbor povjerilaca, a kojim odredbama je propisano da radi zaštite interesa povjerilaca, stečajni sudija može do izbora odbora povjerilaca, ukoliko je potrebno, imenovati privremeni odbor povjerilaca (stav 2.), dok članove privremenog odbora povjerilaca može promijeniti skupština povjerilaca (stav 3).

Sud ukazuje da odluku o daljem poslovanju dužnika, odnosno o tome da li će se poslovanje stečajnog dužnika obustaviti ili privremeno nastaviti (u cijelosti ili u određenom dijelu) će donijeti privremeni odbor povjerilaca.

Također, u ovoj fazi postupka nije moguće znati u kojoj mjeri će povjerioci biti namireni, što će zavisiti od raznih aktivnosti više učesnika koje se tek trebaju preduzimati, prvenstveno prijava potraživanja povjerilaca nakon otvaranja stečaja (članovi 105. i 174. Zakona o stečaju), donošenja odluka od strane povjerilačkih organa o uslovima i načinu unovčenja imovine (član 158. stav 4. Zakona o stečaju), te nakon toga unovčenju imovine od strane stečajnog upravnika (član 160. Zakona o stečaju).

Odluku o imenovanju stečajnog upravnika sud je donio temeljem odredbe člana 70. stav 2 Zakona o stečaju kojom je propisano da stečajni sudija imenuje, između ostalih, stečajnog upravnika, i to rješenjem o otvaranju stečajnog postupka što je propisano odredbama člana 73. stav 1. i člana 104. stav 2. tačka b) istog zakona.

Imenovani stečajni upravnik se nalazi na Listi stečajnih upravnika Federalnog ministarstva pravde FBiH, tako da ispunjava uslove predviđene odredbama člana 71. i člana 73. stav 2. Zakona o stečaju, a istovremeno ne postoji nijedna okolnost koja bi ograničavala imenovanje u smislu odredaba člana 74. i 76. Zakona o stečaju, posjeduje znanje i iskustvo vezano za proizvodnju i reorganizaciju društava u stečaju, isti diplomirani ekonomista i magistar ekonomije sa višegodišnjim iskustvom u navedenoj struci, zbog čega je sud odlučio kao u stavu III izreke ovog rješenja, te za stečajnog upravnika imenovao Almira Bajrić dipl.ecc., iz Tuzle.

Sud je odluku o određivanju ročišta za ispitivanje prijavljenih potraživanja i izvještajnog ročišta donio temeljem člana 106. Zakona o stečaju.

Odluku o objavljivanju otvaranja stečajnog postupka, sud je donio temeljem člana 105. stav 1. Zakona o stečaju.

Temeljem odredbe člana 105. Zakona o stečaju, sud je uputio odgovarajuće pozive povjeriocima i dužnicima stečajnog dužnika.

Upis otvaranja stečajnog postupka u javne registre određen je temeljem odredbe člana 108. stav 1. tačka a.) Zakona o stečaju.

Stečajni Sudija,
Antonela Đaković

POUKA O PRAVNOM LIJEKU:

Protiv ovog rješenja žalbu može izjaviti stečajni dužnik, koja se podnosi Kantonalnom sudu u Tuzli, a putem Općinskog suda u Tuzli, u tri primjerka, u roku od 8 dana od dana dostavljanja rješenja. Žalba ne odlaže izvršenje rješenja.